



FERDINANDO
QUARTO,

PIO, FELICI, AVGVSTO,
Germaniæ, Hungariæ, Bohemiæ

REGI
POTENTISSIMO,
Univerſitas Auſtriaca Vienneniſis
FELICITATEM.

FRIDERICVS *pacificus* MA-
IESTATIS TVÆ *Quadrivovus,*
postquam Filium MAXIMILIA-
NVM *Frankofurti,* anno Virginei par-
tûs *supra Millesimum Quadringentesimum,*
Ocluagesimo Sexto, Romanorum Regem
renunciatum vidit; prolixâ hac, piaquè precatatione quotidie de-
inceps iteratâ, Divino Numini gratum memoremq; se exhibuit.

Nunc dimittas servum tuum Domine, ad
pacem, & tranquillitatem, quam prædestinasti

mihi secundum magnam misericordiam tuam.
DEVS meus: Quia viderunt oculi mei SALUTARE tuum, quod ex me parasti Tuo Populo Christiano, ad tuorum inimicorum destructionem, Filium meum MAXIMILIANVM, inquam, lumen oculorum meorum, & baculum senectutis meae, super quo innixus quietem sumam optatam: O DEVS meus! ô misericordia mea infinita! ô misericordia immensa! quoniam non derelinquis in finem quærentes, & invocantes te; quas igitur laudes ac gratias tibi dicere possum indignus de tantâ gratiâ & munere? si ex toto corde meo ajo, si ex omnibus viribus meis dicere velim, nil facio de meo; Quoniam tua sunt omnia, & ego totus tuus sum, & tua creatura: omnia denique tibi jure debentur bona, quoniam à te sunt facta: accipe tamen secundum Clementiam tuam immensam, & secundum dignationem tuam infinitam de seruo tuo, quod tuum est, tibi què debetur, æternas, & immortales gratias, quia & hanc misericordiam fecisti cum indigno seruo tuo, sicuti fecisti cum seruo tuo David, ut poneres super sedem meam de fructu ventris mei, in conspectu meo, & super thronum Filium meum post me regnaturum populum tuum sanguine tuo pretioso redemptum; Et nunc tu Domine DEVS, cœli & terræ creator & gubernator, liberalissimè audi orationem meam, ut impleas eum Spiritu Sapientiæ, & Intellectus, Fortitudinis & Iustitiæ sicuti Salomonem Filium servi tui David, ut,

possit

possit hæreditatem tuam in unum aggregare, unire, pacificare, custodire, ac gubernare: hostes tuos hæreticos, schismaticos, & infideles, ad viam reducere veritatis, rebelles & obstinatos compescere, & extirpare: fidelem populum tuum ac cultum tibi debitum ampliari & augere. Benedic & sanctifica ipsum benedictione Patrum Abrahamæ, Isaac, & Iacob, ut multiplicetur semen suum super terram sicut stellæ cæli, manus eius fortes fiant, in cervicibus inimicorum tuorum: diligant eum tribus ac populi, ac omnes nationes fideles; accurrant sibi armata auxilia in tempore opportuno, comitentur eum sancti Angeli tui Michaël, Gabriël, Raphaël: sitque illi semper Victoria de cælo tuo, sicut & Achatio & Georgio; Duce S. Mauritio, quatenus pacificis tuis Christianis, obtineat terram Palsionis tuæ sanctæ, despectui & ludibrio tam diu subiectam: nunc enim, ut spero, tempus venit, & venit tempus miserendi, quo Christiana multitudo capta & subacta ab immanissimo, ac turpissimo Turco, terraquæ sancta tua liberabitur per manum meam & Filij mei post me. Da igitur nobis Domine DEVS omnipotens (qui aufers spiritum Principum Tyrannorum; & destruis consilia Regum impiorum) potentiam, & virtutem, ut hæreditatem tuam, & terram sanctam sepulchrumque tuum, (quod vidi meis indignis oculis) possideamus, in syncerâ bonitate, ac purâ innocentia tibi semper seruiamus, semper te sequamur, te diligamus, tibi semper adhæreamus,

te

te nunquam deseramus, ut à te nunquam deseramur, sed ad te post labores, & sudores nostros, quietem perveniamus æternam, Amen.

Ab his tam ardentibus Friderici Quarti pro Filio Maximiliano votis, persuasum omnino habemus non aliena fuisse D. FERDINANDI III. Majestatis Tuæ Parentis Augustissimi pia, iustaque vota, quando eundem Sacri Romani Imperij coronâ fulgentem conspexit: Sunt & bonorum omnium omina non dissimilia; ut nimirum stabilita inter Christianos Principes ac Populos pace, diu, (quod Martialis Poëta Domitiano Cæsari & filio eius apprecatus est) Regas Orbem cum Seniore Senex Parente: nec non impietatem & abominationem Othomannicam in loco sancto tam diu jam sedentem, impièquè exultantem porrectis cælitus armis frangas & extirpes, ita pro Deo & Populo feliciter, gloriosèquè Christianum nomen propagaturus: Neque enim consuetum aliquid, aut vulgare de Te sperare nos sinunt excellentes illæ dotes, & prærogativæ, FERDINANDE REX, quibus ad summum culmen Imperij evectus es: unum Te inter tot Austriacos Principes Romanum Regem, Romani Cæsaris Filium, & Nepotem continuatâ serie veneramus, ex eâdem Familiâ decimum Quartum; qui honos, sicut nulli hactenus Principum contigit, ita tibi gloriosus admodum faustusq; futurus est, si memineris à Caio Iulio decimum Quartum Cæsarem fuisse Traianum optimum Principem: à Constantino Magno Theodosium itidem Magnum, ideam Cæsarem, nuncupatum; à Carolo Magno, ob vitæ sanctitatem inter Divos relatam Henricum: Si præterea memineris numerum hunc, præsertim Serenissimæ Tuæ Domui semper auspiciatum fuisse. Nam ut prætereamus RVDOLPHVM I. illum Austriacæ magnitudinis fundatorem gloriosissimum, quatuordecim Victorijs nomen

nomen *Victoriosi* obtinuisse, eoque in *prælio*, quo *Austriam*
Filio ALBERTO posterisq; *vendicavit*, *quatuordecim*
millia hostium fudisse: ut omittamus etiam CAROLVM
V. decimâ quartâ die Augusti Anno salutis M. D. XX. me-
morabili contra Gallos victoriâ totum Regnum Navarræ rece-
pisse: PHILIPPVM I. decimâ quartâ die Ianuarij
Anno Domini M. D. V. amplissima Castellæ & Legionis Regna
adiisse: Hoc sanè singulare est, & omine divinitus firmato non
caret. Cùm anno decimo quarto post Christi sæculum itidem
decimum quartum FRIDERICVS V. Austriacus
fide religiosè datâ, & religiosus servatâ, IOANNEM
XXII. Pontificem Maximum per Fortunarum penè omni-
um jacturam constantissimè tueretur, factum est, quod nondum
exacto ejusdem sæculi dimidio ALBERTVS itidem V.
non solum Germaniæ, Hungariæ Bohemiæq; coronis eodem anno
indueretur, sed ab eodem etiam tempore potentissima Tua Do-
mus non interrupto ordine, summo in Sacro Romano Imperio ho-
nore, & augustali gloriâ potiatur. Verùm, quamvis hæc mira
sint, & Te undiquè respiciant; numerus tamen hic Decimus
Quartus ideò Tuus peculiariter est, quod sicut, ex geminato
septenario consurgit, ita geminata septem divinissimi Spiritus
dona demonstrat. Nosti FERDINANDE REX
AVGVSTE, septimum à Rudolpho ex Cæsareâ tuâ
Domo Cæsarem fuisse CAROLVM V. in quo certè
Spiritus Sancti dona, præsertim verò donum Fortitudinis mirifi-
cè eluxit: Quid hic superest, nisi ut nobis persuadeamus septem
hæc Divi CAROLI dona geminanda in Te, qui à
CAROLO Septimus es: ut quemadmodum ille infide-
lium omnium, ac præsertim Turcarum terror fuit maximus;
ita Tu eorundem prorsus Victor, ac Debellator evadas; Et
quis scit an non ideò eodem aureo vellere indutus fueris, quod

CAROLVS V. *gestavit, ut scilicet ejusdem bellicarum virtutum quoq; Heres, & propagator, ubi spiritus ejus duplex in Te factus fuerit, ea tandem pro Ecclesiæ Orthodoxæ incrementis, pro Augustissimæ Domus Tuæ perenni gloriâ perficias, quæ inchoare poterat, non perficere* **CAROLVS.** *Cujus proinde, sicut & reliquorum Cæsarum Austriacorum Effigies oculis Tuis subijcimus, virtutum Elogia animo: ut & videas, qua sis ab origine natus, & quantam spem Christianus Orbis in Te ponat, quem nimirum non solum Austriacæ Majestatis, sed virtutis quoq; hæredem venerabundus agnoscit. Sit igitur hæc Corona Majorum Tuorum potissimum Regiæ Majestatis Tuæ ornamentum: sit ad sublimia illa, quæ* **PRO DEO ET POPVLO,** *confecturus es, acer stimulus: sit* **CORONA GRATVLTATIONIS** *nostræ, DECORIS TVI.*

MAIESTATIS TVÆ

Humillimi

N. IV. Facultatum Academi-
carum Decani.

